

115

Mentula habet instar triginta iugera prati,
 quadraginta arvi: cetera sunt maria.
 cur non divitiis Croesum superare potis sit
 uno qui in saltu tot bona possideat,
 5 prata, arva, ingentis silvas saltusque paludesque
 usque ad Hyperboreos et mare ad Oceanum?
 omnia magna haec sunt, tamen ipse est maximus ultro,
 non homo, sed vero mentula magna minax.

116

Saepe tibi studioso animo venante requirens
 carmina uti possem mittere Battiadae,
 qui te lenirem nobis, neu conarere
 tela infesta meum mittere in usque caput,
 5 hunc video mihi nunc frustra sumptum esse laborem,
 Gelli, nec nostras hinc valuisse preces.
 contra nos tela ista tua evitamus amictu,
 at fixus nostris tu dabis supplicium.